



BILTEN

AGENCIJA ZA PREDŠKOLSKO OSNOVNO I SREDNJE OBRAZOVANJE

oktobar - decembar 2023. godine



Dragi naši eTwinner-i,



vrijeme kao da je postalo neuhvatljivo i fascinira nas brzinom svjetlosne godine u kojoj se dogodio ogroman broj fantastičnih eTwinning događaja. Na devetogodišnjem putu eTwinning-a u Bosni i Hercegovini može se vidjeti neizbrisiv svjetlucavi trag sastavljen od velikog broja eTwinning zvijezda koje čine jedno ogromno obrazovno sazviježđe. Ponosni smo na to što upravo to „eTwinning-ovo sazviježđe“ predstavlja dio obrazovnih sistema u Bosni i Hercegovini, što smo postali vidljivi, sjajni, značajni i dostupni svim nastavnicima koji žele i spremni su da se profesionalno razvijaju i stručno usavršavaju. Dostupnost eTwinning-a je i za one nastavnike koji su spremni da

u ovom procesu budu i učitelji i učenici, predavači i slušaoci i sve one koji žele sarađivati s drugima i aktivno učestvovati na mnogobrojnim eTwinning događajima. Ovo je prilika za nastavnike koji žele sebi olakšati nastavni proces tako što će ga učiniti zanimljivijim, inovativnijim i kreativnijim kako za njih same tako i za njihove učenike. U tako osmišljenom nastavnom procesu je na prvom mjestu učenik dok je nastavnik taj koji vodi i usmjerava svoje učenike na putu sticanja novih znanja, vještina i kompetencija neophodnih za naredni nivo obrazovanja, svakodnevne životne situacije i spremnost za život u 21. vijeku.

Ta „Galaksija eTwinning-ovih zvjezdica“ se neprekidno širi i stvara prepoznatljiv logo za unapređenje kvaliteta nastavnog procesa u Bosni i Hercegovini koji bi trebao biti dostupan i prilagođen svim nastavnicima i školama.

Gledajući na protekli period, ispisali smo mnogo zajedničkih eTwinning bilježnica i ostvarili brojne eTwinning uspjehe i rezultate. Mi, kao eTwinning tim Bosne i Hercegovine, veoma smo zadovoljni postignutim rezultatima, ponosni na zajedničke uspjehe i realizovane cikluse, te na osnovu svih objektivnih pokazatelja želimo Vam čestitati na svim eTwinning postignućima i izraziti veliku zahvalnost za Vašu podršku, kontinuiranu saradnju i učešće u realizaciji ovog programa.

U prošloj godini smo uz eTwinning bili i INOVATIVNI i KREATIVNI i vrlo odvažno **DONIJELE** veliki broj eTwinning projekata, a zaslužen su mnogi od Vas **PONIJELE** eTwinning nagrade dok su se oni, koji su bili još uspješniji, okitili i epitetima najboljih, najinovativniji eTwinner-a i eTwinning ambasadora. U narednu godinu ulazimo još spremniji, iskusniji i odvažniji za mnogo više postavljenih ljestvica na „eTwinning merdevinama“ kvaliteta odgoja i obrazovanja. Motivacija za visoko postavljanje ciljeva i standarda u narednoj godini treba biti i eTwinning godišnja tema **DOBROBIT** u školama. A šta bi nas to bolje inspirisalo kao cilj, do ovog, da u svim segmentima odgoja i obrazovanja bude dobro i bolje. Budući da dobrobit ima mnogo aspekata, unapređenje dobrobiti učenika u školama zahtijeva pristup cijele škole, uključujući

cjelokupnu školsku zajednicu (učenici, nastavnici, roditelji i svi oni koji učestvuju u životu i radu škole). Na putu ostvarivanja visoko postavljenih ciljeva ne smijemo posustajati jer se sve može postići na niz manjih načina, čiji kumulativni efekti mogu imati vrlo snažan uticaj na osjećaj dobrobiti naše djece i učenika. eTwinning Vam omogućava da istražite ovu temu i integrirate je u Vaše nastavne planove i programe i nastavni proces kako biste osigurali da obrazovni sistemi u Bosni i Hercegovini budu nepristrasni i inkluzivni. Promocijom stavova da svi imaju mogućnost ostvarivanja vlastitih potencijala, bez obzira na lične okolnosti (spol, rodni identitet, nacionalnost, vjeroispovijest, sposobnosti) i porodične, kulturološke i društveno-ekonomske pozadine svih nastavnika i učenika, bit ćete na pravom putu.

Dragi nastavnici, eTwinning-i sami birate svoje izbore. Ne možete uticati na mnoge okolnosti, ali možete uticati na proces koji vodite u svojim učionicama. Na kraju, na tim Vašim potezima, ne samo da će Vam biti zahvalni učenici, nego i cijelo čovječanstvo.

Neka Nova 2024. godina donese zdravlje, sreću i pregršt dobrog raspoloženja Vama i Vašim porodicama, a eTwinning neka bude dio dobrobiti koja će ispunjavati Vas i Vaše okruženje. Uz adekvatne pristupe nastavnom procesu uključujući dobrobiti po svim osnovama, učenici će moći razvijati svoje potencijale, učiti i kreativno se igrati te sticati funkcionalna znanja koja mogu iskoristiti u svakodnevnim životnim situacijama. Učenici koji doživljavaju dobrobit mogu izgraditi i uživati u pozitivnim odnosima s drugima i osjećati pripadnost svojoj školskoj zajednici, što svakako moramo vratiti kao premisu u naše školske zajednice.

Sretna Nova 2024. godina!

Vaš eTwinning tim BiH

eTwinning



eTwinning vijesti:



Deveta godišnja eTwinning konferencija pod nazivom „Budi IN! Budi eTwINer!” održana je 3. i 4. oktobra na Vlačiću



Konferencija je okupila 75 učesnika eTwinning zajednice iz Bosne i Hercegovine: odgajatelje, učitelje, nastavnike iz osnovnih škola i profesore iz srednjih škola, stručne saradnike, bibliotekare, direktore odgojno-obrazovnih ustanova i predstavnike Agencije za predškolsko, osnovno i srednje obrazovanje.

Konferenciju je otvorila Maja Stojkić, direktorica Agencije za predškolsko, osnovno i srednje obrazovanje, dok je uvodni



motivacijski govor održala Nataša Vrapčević, eTwinning ambasadorica iz Srbije.

U toku konferencije realizovane su plenarne sesije u cilju informisanja učesnika pregledom stanja u eTwinning zajednici u BiH, uz prezentaciju postignuća i planova do kraja 2023. godine.

Organizovano je 9 tematskih radionica na različite teme, a koje su u fokusu imale Godišnju eTwinning temu 2023 s diskretnom konekcijom na Godišnju eTwinning temu 2024. Radionice su vodile eTwinning ambasadorice i eTwinning ambasador te članice Državne organizacije za podršku eTwinning-u u Bosni i Hercegovini, uz sjajan prezentatorski angažman istaknutih i višestruko nagrađivanih eTwinner-a.




Drugi dan konferencije je u potpunosti bio posvećen kvalitetu i kriterijima kvaliteta u eTwinning-u, a obogatili smo ga izuzetnim Sajmom aktivnih eTwinning projekata, kao prilikom za upoznavanje, učenje, umrežavanje i saradnju u postojećim i budućim eTwinning projektima i inicijativama.

Tradicionalno, upriličena je svečana ceremonija dodjele eTwinning nagrada i priznanja. Na osnovu glasanja članova eTwinning zajednice i posebnih kriterija postavljenih od strane Centralne službe za podršku, Evropske komisije i Državne organizacije za podršku eTwinning-u u Bosni i Hercegovini, dodijeljene su nagrade u sljedećim kategorijama:




-  **Najbolji eTwinning ambasador** – Nada Sokolović, JU OŠ „Osman Nakaš“ Sarajevo;
-  **Najinovativniji eTwinner** – Senida Čeljo, JU Srednja ekonomska škola, Sarajevo;

-  **Najistaknutiji eTwiner** – Lejla Hujdur, JU Srednja ekonomska škola, Sarajevo;
-  **Oznaka za najbolju eTwinning školu** – JU OŠ „Bijelo Polje” Potoci, Mostar;
-  **Izuzetna promocija eTwinning-a s ciljem profesionalnog razvoja nastavnika u BiH** – Selma Mahmić, JU OŠ „Kiseljak 1” Bilalovac u Kiseljaku;
-  **eTwiner-i čiji su projekti nominovani za eTwinning Evropsku nagradu** – Edita Vuković-Antolović, J.P.U. „Ivančica” Usora, projekt **“Our heritage for sustainable future”**;
-  Mira Vidaković, JU OŠ „Aleksa Šantić” Osmaci, projekt **“The beauty of reading 3/Ljepota čitanja 3”**;
-  Vesna Ivančević, JU OŠ „Osman Nuri Hadžić”, Sarajevo, projekt **“STEAM Dream Team”**;
-  Senida Čeljo, JU Srednja ekonomska škola Sarajevo – projekt **“Action time”**.

Na takmičenju **„Obilježavanje Dana planete Zemlje”** nagrađeni su:

-  Prvim mjestom: nastavnica Melisa Husejnović
-  Drugim mjestom: nastavnica Merima Pjanić
-  Dva treća mjesta: Eko družina vrtića „Maslačak” i Ekološka sekcija JU Prve osnovne škole Zavidovići.

Na takmičenju **„Obilježavamo eTwinning dan”** nagrađeni su:

-  Prvim mjestom: nastavnica Armansa Spahić
-  Drugim mjestom: direktorica predškolske ustanove Sanela Dolić
-  Trećim mjestom: nastavnica Selma Islamović-Karabdić.

Pored eTwinning priznanja i nagrada, dodijeljene su i zahvalnice voditeljima radionica i prezentatoricama i prezentatorima na konferenciji: eTwinning ambasadoricama Nataši Vrapčević, Azri Šoš, Lejli Hujdur, Fatimi Kličić, Nadi Sokolović, Snežani Stević, Danki Milić-Kezunović, eTwinning ambasadoru Milošu Džokoviću, eTwiner-ima Alisi Bravić, Edini Fišeković-Ibišević, Elviri Jašarbašić, Dajani Ostojić, Mireli Avdibegović, Dragani Arsić, Merhunisi Čerkez i Dini Mulaliću.

Konferenciju je zatvorila Alisa Ibraković, eTwinning koordinatorica za Bosnu i Hercegovinu.

Pozivamo vas da se pridružite eTwinning zajednici i zajedno sa kolegama i saradnicima iz brojnih država Evropske unije i šire krenete na uzbudljivo eTwinning profesionalno putovanje!

Predstavljamo naše eTwinning ambasadore: <https://bit.ly/3GXXMMv>

Predstavljamo naš eTwinning tim: <https://bit.ly/41GU1ob>

Zajedničkim osposobljavanjem ambasadora eTwinning-a i programa Erasmus+ obilježeni Dani Erasmus-a 2023 u Biogradu na Moru, Hrvatska



Od 10. do 12. oktobra 2023. godine, u organizaciji Nacionalne organizacije za podršku eTwinning-u koja djeluje u sklopu Agencije za mobilnost i programe Evropske unije, održano je Zajedničko osposobljavanje ambasadora eTwinning-a i programa Erasmus+ iz Hrvatske, Bosne i Hercegovine, Crne Gore i Slovenije. Trodnevno osposobljavanje održano je u Crvenoj Luci kod Biograda i okupilo je preko 40 učesnika.

Predstavnica Državne organizacije za podršku eTwinning-u u BiH, ukratko je predstavila realizovane eTwinning aktivnosti u BiH, kao i značajne rezultate proteklog eTwinning perioda stavivši naglasak na

uzajamnu saradnju državne organizacije za podršku i eTwinning ambasadora u realizaciji postavljenih ciljeva. eTwinning ambasadori Bosne i Hercegovine su se prisutnima predstavili kratkim i veoma inovativnim video prilogom. Također, istaknuta je važnost regionalne saradnje u ostvarivanju postavljenih ciljeva u prezentovanju plana aktivnosti za naredni period.

Nakon predavljanja značaja i doprinosa ambasadora u promociji eTwinning-a i Erasmus+ programa te upoznavanja i razmjene iskustava i iz drugih zemalja, učesnici su imali priliku učestvovati u radionici „Društvene mreže i kako komunicirati da vas se čuje u gomili“. Kako bi pomogli korisnicima vratiti povjerenje u eTwinning na novoj platformi te podržati postojeće korisnike Erasmus+ programa, eTwinning ambasadori i ambasadori Erasmus+ programa u grupnom radu su zajednički kreirali projektne komplete uzimajući u obzir programske prioritete – zeleno, inkluzivno, zatim kako koristiti eTwinning u planiranju, implementaciji i diseminaciji Erasmus+ projekta s konkretnim primjerima i uputama.

Učesnici su slušali i predavanje o umjetnoj inteligenciji u obrazovanju putem Zoom-a, a osposobljavanje je završeno razmjenom iskustava u privlačenju novih i motiviranju neaktivnih korisnika, o radu na prioritetima Erasmus+ i eTwinning programa, te planiranjem buduće saradnje poput sajмова za pronalaženje projektnih partnera i ostalih relevantnih događanja.

Mnoge aktivnosti koje su realizovane u Bosni i Hercegovini u prethodnom periodu, prihvaćene su od strane učesnika iz drugih zemalja kao velika inspiracija za njihov budući rad i planirane aktivnosti. Mi, kao eTwinning tim, smo još jednom potvrdili značaj uloženog truda u prethodnom periodu jer su naši rezultati vidljivi i veoma mjerljivi te nam daju dobru refleksiju kako dalje raditi.

*Dio teksta preuzet/ <https://www.etwinning.hr/hr/novosti/zajednickim-osposobljavanjem-ambasadora-etwinninga-i-programa-erasmus-obiljezeni-dani-erasmusa-2023/>



Trodnevni međunarodni eTwinning seminar u Beogradu



Predstavnice Državne organizacije za podršku eTwinning-u u Bosni i Hercegovini imale su priliku prisustvovati trodnevnom međunarodnom seminaru koji se održao od 25. do 27. oktobra 2023. godine u Beogradu u Hotelu Mona. Seminar pod nazivom: ***Our schools: Places of happiness and success- fostering well-being and creativity through eTwinning*** je još jedno povezivanje prošlogodišnje eTwinning teme sa novom godišnjom temom Dobrobit u školama.

Na ovom seminaru je učestvovalo 55 predstavnika (DOP-a, nastavnika i eTwinning ambasadora) iz 12 evropskih zemalja. Kada je u pitanju region, sve zemlje su imale svoje predstavnike (Srbija, Hrvatska, Bosna i Hercegovina, Sjeverna Makedonija, Slovenija, Crna Gora). Izuzetnim radioničkim i plenarnim dijelom i ovaj eTwinning susret je još jednom potvrdio važnost seminara uživo za

razmjenu ideja, dijeljenja dobrih praksi, uspostavljanje saradnje i komunikacije te stvaranje novih eTwinning projekata. eTwinning zajednica još jednom potvrđuje koliko može biti inkluzivno i inspirativno okruženje za učenje. Pregršt inovativnih metoda i strategija podučavanja bit će zasigurno smjernica za kvalitetne eTwinning projekte, ali i za akademsku izvrsnost kao i emocionalni i društveni razvoj.



Promocija eTwinning škola u BiH 🇧🇦

Primjeri dobre eTwinning prakse se mogu vidjeti u mnogim školama Bosne i Hercegovine. Jedna od njih je i OŠ „Sveti Sava“ iz Foče. Ova škola i pojedini nastavnici iz ove škole su dugogodišnji eTwinning-i i to je škola koja je po svim kriterijima dugogodišnja dobitnica oznake eTwinning škola.



Škole kojima je dodijeljena oznaka eTwinning škole, sjajan su primjer načina na koji cijela škola može imati koristi od eTwinning-a. Aktivne su u implementaciji i promociji eTwinning vrijednosti i pedagoških pristupa, referentna su tačka za lokalnu zajednicu i predstavljaju model za ostale škole. eTwinning pomoću te oznake prepoznaje i pohvaljuje uključenost, angažman i predanost ne samo pojedinačnih eTwinning-a, nego i cijele škole, u kojoj saraduju timovi nastavnika i direktora.

<https://school-education.ec.europa.eu/hr/recognition/etwinning-school-label>

https://www.facebook.com/svetisavafoca/?locale=sr_RS



Medijska i informatička pismenost kroz eTwinning



EUROPE HOUSE, SARAJEVO 25.10.2023. 10-16:30 h



10:30-11:30 h Radionica za djecu: Mali trikovi za bezbjedan internet
JU Biblioteka Sarajeva

13-14 h Radionica za djecu: Neka tvoj face bude happy face
JU Biblioteka Sarajeva

14-15 h Prezentacija: Medijska i informacijska pismenost kroz eTwinning
eTwinning ambasadori, Agencija za predškolsko, osnovno i srednje obrazovanje



„eTwinning glas“ se čuo i na izuzetno osmišljenom Sajmu za medijsku i informacijsku pismenost. Učesnici sajma su saznali kako i na koji način primjenjujemo eTwinning kroz medijsku i informacijsku pismenost! Našeiskusne eTwinning ambasadorke Lejla Hujdur i Nada Sokolović su još jednom pokazale izuzetne primjere promocije eTwinning-a i njegove integracije na drugim poljima i okruženjima.

Ova promocija je otvorila novi vid saradnje sa Regulatornom Agencijom za komunikacije u Bosni i Hercegovini, organizatorom ovog značajnog sajma. Razmjenom iskustava i uspostavljenjem saradnje, želimo jačati naše resurse koji bi dali podršku unapređenju kvaliteta medijske i informacijske pismenosti na svim nivoima odgoja i obrazovanja.

Održana 7. Regionalna EPALE konferencija: Evropska godina vještina



7. Regionalna EPALE konferencija održana je 9 - 10. 11. 2023. godine na Jahorini u Bosni i Hercegovini. U okviru projektnog ciklusa EPALE 2022 - 2024, Agencija za predškolsko, osnovno i srednje obrazovanje i Državni tim za podršku (NSS) EPALE Bosna i Hercegovina u saradnji sa NSS EPALE timovima iz Srbije, Slovenije, Hrvatske, Sjeverne Makedonije i Crne Gore organizirala je 7. Regionalnu EPALE konferenciju: Evropska

godina vještina u periodu 9 - 10. 11. 2023. godine. Dvodnevni događaj održan je u hotelu „Vučko“ na Jahorini.

Konferenciju je otvorila direktorica Agencije za predškolsko, osnovno i srednje obrazovanje Maja Stojkić. Sve prisutne pozdravio je i državni koordinator EPALE u Bosni i Hercegovini Siniša Gatarić.

Velikim brojem radionica i prezentacija učesnici su imali priliku da spoznaju prednosti uključivanja u EPALE zajednicu te da mnoga znanja i vještine unaprijede. Ovo je bila prilika i za saradnju i nove projektne ideje na evropskim platformama. Učeće na ovoj konferenciji su ostvarili i članovi eTwinning tima Bosne i Hercegovine i predstavnik eTwinning ambasadora Bosne i Hercegovine.

Sve prezentacije prvog dana konferencije su dostupne za preuzimanje putem ovog [EPALE resursa](#).

eTwinning

Regionalna radionica za profesionalni razvoj eTwinning ambasadora



Regionalna radionica za profesionalni razvoj (PDW) eTwinning ambasadora pod nazivom Stvaranje kulture dobrobiti – “eTwinning Wellness” se održala u Sarajevu, od 5. do 7. decembra 2023. godine. Učesnici su bili eTwinning ambasadori i predstavnici NSO iz Slovenije, Hrvatske, Srbije, Sjeverne Makedonije i Bosne i Hercegovine.



Cilj ovog eTwinning događaja je saradnja i zajedničko osposobljavanje eTwinning ambasadora na međunarodnom i regionalnom nivou u cilju jačanja kapaciteta i razvoja kompetencija za složene zadatke i uloge koje obavljaju.

Učesnici su mogli aktivno učestvovati u organizovanim paralelnim radionicima kao i mnogo toga naučiti uz motivacijskog govornika na temu *Nastavnički leadership iz perspektive pozitivne psihologije:*

Izgradnja kapaciteta za jačanje blagostanja u školama. Dvije panel diskusije su bile odlična prilika za mapiranje buduće regionalne saradnje državnih organizacija za podršku eTwinning-u i kako i na koji način eTwinning ambasadori mogu uticati na unapređenje kvaliteta eTwinning projekata i motivaciju nastavnika potencijalnih eTwinners-a.



eTwinning ambasadori su pripremili šest radionica s ciljem razmjene dobre prakse, na kojima su nesebično podijelili svoja iskustva, znanja i ideje o tome šta jeste dobrobit u odgojno-obrazovnim sistemima i odgojno-obrazovnom procesu za djecu/učenike, nastavnike, porodice i društvo u cjelini te na koji način bi se ova tema mogla približiti i aktualizirati preko eTwinning aktivnosti u kurikulumu i općenito ugraditi u klimu i kulturu odgojno-obrazovnih ustanova.

Na ovom događaju su predloženi eTwinning kompleti koji će biti dostupni na korištenje svim eTwinner-ima. Sastanak je završen u skladu sa krilaticom da je Saradnja ključ uspjeha i da ćemo nastaviti još aktivnije i svrsishodnije sarađivati radi postavljenih eTwinning ciljeva i dobiti naše djece i učenika kao i cijele školske zajednice.

Info kit za PDW sastanak: <https://bit.ly/3RBhy5h>

Sastanak predstavnika Državne organizacije za podršku eTwinning-u u Bosni i Hercegovini sa eTwinning ambassadorima Bosne i Hercegovine



Četvrti sastanak DOP-a BiH i eTwinning ambasadora je održan 6.12. 2023. godine u hotelu „Hollywood“ na Ilidži.

Cilj sastanka je bio sumirati zajedničke aktivnosti i rezultate rada eTwinning ambasadora u kalendarskoj 2023. godini, ali i dati prijedloge i ideje za realizaciju aktivnosti za eTwinning ciklus 2024 -2026.

Organizacija sastanka sa predstavnicima obrazovnih vlasti u Bosni i Hercegovini Mogućnosti integracije eTwinning-a u obrazovne sisteme Bosne i Hercegovine



Sastanak je održan u online formatu 18. 12. 2023. godine, od 9:00 do 11:30, putem ZOOM aplikacije.

Svrha ovog sastanka je bila upoznati predstavnike obrazovnih vlasti sa profesionalnim razvojem nastavnika u sklopu eTwinning-a i prednostima koje školske zajednice ostvaruju pristupom i aktivnim učešćem u ovoj najvećoj zajednici nastavnika u Evropi.


Također, jedan od ciljeva sastanka je bio utvrditi:

- načine i mogućnosti praćenja i vrednovanja sa aspekta profesionalnog razvoja nastavnika;
- priznavanje rada i učešća nastavnika u evropskim projektima;
- mogućnosti napredovanja; metodološko i pedagoško usavršavanje za škole i nastavnike;
- ntegracija u nastavne planove i programe;
- mogućnosti integracije u inicijalno obrazovanje nastavnika, te ostala područja djelovanja i uticaja.
-

Sastanak su vodile predstavnice Agencije za predškolsko, osnovno i srednje obrazovanje, članice eTwinning tima, a iskusni i nagrađivani eTwiner-i Bosne i Hercegovine predstavili su prednosti koje nastavnici i cjelokupna školska zajednica ostvaruju aktivnim učešćem u eTwinning programu.

Dobijene preporuke i zaključke sa ovog sastanka dostavljeni su svim učesnicima kako bi u odnosu na dostavljeno mogli djelovati u narednom periodu, a u okviru svojih nadležnosti.

Sastanak državnih organizacija za podršku Erasmus+ programa u Bosni i Hercegovini (eTwinning i EPALE)



ONLINE Sastanak Državnih timova za podršku (NSS) [EPALE Bosna i Hercegovina](#) i [eTwinning Bosna i Hercegovina](#) i Sastanak EPALE i eTwinning ambasadora iz Bosne i Hercegovine JE ODRŽAN 21. 12. 2023. godine. Na sastanku su prisustvovali predstavnici Agencije za predškolsko, osnovno i srednje obrazovanje, odnosno članovi NSS timova oba ERASMUS+ programa, kao i ambasadori oba programa. Predstavljeni su rezultati i postignuća iz 2023. godine i nove ideje za nastavak ERASMUS+ saradnje.

Unapređenje dobrobiti u školi



Mnogo više možete pronaći na: <https://www.coe.int/en/web/campaign-free-to-speak-safe-to-learn/improving-well-being-at-school>

Dobrobit učenika i njihov uspjeh u školi i izvan nje zavisi od njihove sposobnosti da svoje kompetencije iskoriste za demokratsku kulturu.

Budući da dobrobit ima dosta aspekata, unapređenje dobrobiti učenika u školama zahtijeva pristup cijele škole, uključujući i nastavnike i roditelje.

Škole bi trebale pružiti lekcije usmjerene na odgovorno korištenje interneta, potrebu za usvajanjem zdravog načina života i kako spriječiti zdravstvene probleme ili se nositi s njima, u saradnji sa uključenim osobama, uključujući zdravstvene i socijalne službe, lokalne vlasti i organizacije civilnog društva.

Šta je blagostanje?

Blagostanje je iskustvo **zdravlja i sreće**. Uključuje mentalno i tjelesno zdravlje, tjelesnu i emocionalnu sigurnost te osjećaj pripadnosti, osjećaj svrhe, postignuća i uspjeha.

Dobrobit je širok pojam i obuhvata **niz mentalnih i fizičkih sposobnosti**. Kaže se da postoji pet glavnih tipova blagostanja:


- **Emocionalno blagostanje** – sposobnost otpornosti, upravljanja vlastitim emocijama i generisanja emocija koje vode dobrim osjećajima
- **Tjelesno blagostanje** – sposobnost unapređenja funkcionisanja vlastitog tijela zdravom prehranom i dobrim navikama tjelovježbe
- **Društveno blagostanje** – sposobnost komuniciranja, razvijanja značajnih odnosa s drugima i stvaranja vlastite mreže emocionalne podrške
- **Dobrobit na radnom mjestu** – sposobnost ostvarivanja vlastitih interesa, uvjerenja i vrijednosti u svrhu sticanja smisla i sreće u životu i profesionalnog obogaćivanja
- **Društveno blagostanje** – sposobnost učešća u aktivnoj zajednici ili kulturi.

Zašto je dobrobit važna u školi?

Dobrobit je važna u školi jer škole imaju ključnu ulogu u pružanju **podrške učenicima da izaberu zdrav način života i razumiju efekte svojih izbora na njihovo zdravlje i dobrobit**. Djetinjstvo i adolescencija su kritični period u razvoju dugoročnih stavova prema vlastitoj dobrobiti i izboru načina života. Društvene i emocionalne vještine, znanja i ponašanja, koje mladi ljudi uče u učionici, pomažu im da izgrade otpornost i postave obrazac kako će upravljati svojim fizičkim i mentalnim zdravljem tokom života.

Kako se škole mogu aktivirati?

Rješavanje problema dobrobiti učenika u školi počinje **pomaganjem učenicima da osjete da su svi poznati i cijenjeni kao pojedinci sami po sebi, te da školski život za njih ima smisao i svrhu**. To se može postići na niz malih načina, čiji kumulativni učinak može imati vrlo snažan uticaj na osjećaj dobrobiti učenika.



eTwinning

Za mnogo dobrih bilten senzacija!

(slijedi)

Mjesečna doza eTwinning vibracija!



Na kraju svake kalendarske godine eTwinning tim Bosne i Hercegovine veoma detaljno analizira sve urađene aktivnosti, sumira sve evaluacije dosadašnjeg rada i na veoma objektivan način donosi zaključke koji usmjeravaju naš tim ka uspješnoj realizaciji narednih aktivnosti. Može se zaključiti da je vrijednost timskog rada zaista neprocjenjiva jer rad u timu nam omogućuje da učimo jedni od drugih, ali i da uočavamo pogreške jedni drugih, te da na temelju toga možemo izbjeći buduće pogreške, steći uvid u različite perspektive i naučiti nove koncepte od drugih članova tima. Dobre strukture timskog rada pružaju našem timu raznolikost mišljenja, kreativnost, perspektive, prilike i pristupe rješavanju problema. Zdravo timsko okruženje omogućuje nam da zajedno razmišljamo i kreiramo te naglas donosimo prijedloge i ideje, a zauzvrat povećavamo naš uspjeh u rješavanju problema te do mnogih rješenja dolazimo učinkovitije i brže.

Naša saradnja i ohrabrenje osiguravaju sinergiju na radnom mjestu. S tim „alatima“ članovi našeg tima mogu imati veći osjećaj uspjeha, kolektivno smo odgovorni za postignute ishode jer svoje ciljeve visoko postavljamo. Za rezultat svih zajedničkih aktivnosti, stvara se radno okruženje na temelju zajedništva, povjerenja, podrške i na kraju mjerljivih REZULTATA. Odgovor našeg uspjeha u realizaciji eTwinning aktivnosti i dostizanju postavljenih ciljeva leži u dvije stvari, a to su sinergija vrijednosti timskog rada, ali i ključne uloge voditelja ovog procesa.

Svaki tim ne bi u pravom smislu bio tim da nema i ulogu koja podrazumijeva kvalitetno vođenje tima. Mnoga istraživanja pokazuju da lider koji ne može raditi s timom je u samom startu neuspješan lider, što nas usmjerava na to da voditelj tima mora imati itekako dobro razvijenu emocionalnu inteligenciju i biti u stanju pružiti adekvatnu viziju svim članovima tima. A zašto govorimo o važnosti vođenja tima, o karakteristikama koje voditelj tima treba posjedovati, jeste upravo svrha intervjua posljednjeg Twinning biltena u 2023. godini. Jer, ko bi nas mogao bolje informisati o realizovanim eTwinning aktivnostima, postignutim uspjesima, eventualnim rizicima ili propustima, mjerljivim rezultatima od onog ko je u ovoj godini bio voditelj najvećeg broja eTwinning aktivnosti. Osoba sa kojom imamo čast razgovarati i koja će najbolje predstaviti sve ono što je urađeno u proteklom periodu je osoba, koja je neustrašiva u smislu kada se donose i teške odluke, puna je samopouzdanja u donošenju odluka sa kontinuiranom efektivnom komunikacijom koju ostvaruje sa članovima tima, eTwinning ambasadorima i svim onima koji učestvuju u ovom procesu te se moglo i očekivati da će svi postavljeni ciljevi u ovoj godini biti ostvareni. Zbog svega navedenog, imamo čast razgovarati sa zamjenicom državne koordinatorice za podršku eTwinning-u u Bosni i Hercegovini, stručnom savjetnicom za predškolski odgoj i obrazovanje, **Hašimom Ćurak**.

Draga Hašima, prije svega, drago nam je da imamo priliku razgovarati sa Vama i kroz ovaj kratki intervju upoznati sve zainteresovane o značaju učešća Bosne i Hercegovine u eTwinning zajednici, kao i značaju postignutih rezultata u prethodnom periodu. Uloga voditeljice nije nimalo laka. U teorijskom smislu, svi znamo koje su to odlike koje voditelji poslovnih procesa trebaju imati, ali u suštini svjedoci smo i toga da sve što je u teoriji ne mora biti i u praksi. Zbog toga bi nam bilo izuzetno značajno da nam odgovorite na nekoliko pitanja, kako bismo i druge upoznali o značaju Državne organizacije za podršku i njenom uticaju na promociju eTwinning-a u Bosni i Hercegovini.

 **Preuzevši ulogu zamjenice državne koordinatorice početkom 2023. godine, u skladu sa već postavljenim ciljevima, na šta ste se prvo fokusirali i na koji način ste planirali realizaciju eTw aktivnosti?**

Aktivnija uloga koju sam preuzela u eTwinning timu BiH u 2023. godini u odnosu na prethodne kalendarske godine i prethodne eTwinning cikluse predstavljala je za mene veliku odgovornost i profesionalni izazov, naročito zbog činjenice da je ovaj vremenski period bio obilježen tehničkim poteškoćama tranzicije sa već poznate eTwinning platforme na novu, Evropsku platformu za školsko obrazovanje, jedinstvenu platformu koja objedinjava prijašnje platforme i usluge eTwinning-a, School Education Gateway i Teacher Academy. Državna organizacija za podršku je u tom periodu zaprimala veliki broj upita i zahtjeva za podrškom od registrovanih članova eTwinning zajednice u BiH, uslijed pomenute tranzicije i nedostupnosti podataka o korisnicima i projektima. To je zahtijevalo pojačan angažman svih članova našeg tima, strpljenje, taktičnost i dosljedno traganje za adekvatnim odgovorima, radi zadržavanja već registrovanih i motivisanja potencijalnih korisnika eTwinning-a.

Slijedom kalendara događaja za eTwinning ciklus 2022-2024 i okvirnog godišnjeg plana aktivnosti u uslovima otežanog i ograničenog funkcionisanja određenih performansi platforme, postupajući po instrukcijama i u saradnji sa Centralnom službom za podršku, Državna organizacija za podršku eTwinning-u je početkom 2023. godine bila u obavezi učestvovati u delikatnim procesima pripreme za dodjelu oznake eTwinning škola, dodjele Evropske oznake kvaliteta, pripreme za moderaciju aplikacija za Nacionalnu oznaku kvaliteta te nominacije za evropsku nagradu. To su veoma važni procesi za sve NSO i eTwinning zajednicu, sa zadanim vremenskim rokovima, i bili su nam apsolutni prioriteti.

Paralelno s tim obavezama, sa našim eTwinning ambasadorima smo organizovali sastanke i pomagali u izradi individualnih akcionih planova rada svakog eTwinning ambasadora. Zajedno sa članovima eTwinning tima, detaljno smo razradili plan organizacije domaćih eTwinning događaja i učešća u međunarodnim eTwinning događajima, aktivnostima profesionalnog razvoja i promocije eTwinning-a i platforme do kraja kalendarske godine, u skladu s općim i specifičnim ciljevima, Godišnjom eTwinning temom 2023 te prioritetima i potrebama eTwinning zajednice.

 **Kako biste opisali podršku i saradnju od članova tima i Državne koordinatorice i možete li nam reći „recept“ u smislu sinergije u radnim aktivnostima.**

eTwinning tim Državne organizacije za podršku eTwinning-u u Bosni i Hercegovini broji sedam članova zaposlenih u Agenciji za predškolsko, osnovno i srednje obrazovanje koji eTwinning projektne aktivnosti obavljaju u okviru određenog procenta svog radnog vremena i jednog člana tima kao saradnika angažovanog na puno radno vrijeme na poslovima tehničke podrške u projektu.

Voditeljica tima je ujedno i državna koordinatorica za eTwinning Bosne i Hercegovine koja nas je svojom upornošću, pozitivnom energijom, dijeljenjem liderstva sa ostalim članovima tima dosta osnažila za brojne izazove s kojima smo se susretali i izborili u toku ove kalendarske godine. Činjenica da većina članica eTw tima imaju dugogodišnje iskustvo rada u neposrednom odgojno-obrazovnom procesu u odgojno-obrazovnim ustanovama je također važna za spomenuti radi otvorenosti, posjedovanja kompetencija i vještina građenja kulture timskog rada, preuzimanja odgovornosti, uvažavanja, podrške i pozitivne komunikacije. Posvećeni smo zajedničkom cilju i volimo eTwinning.

Kao naročitu vrijednost u funkcionisanju našeg tima istakla bih humor, koji je visoko cijenjen kao motivator i jedna je od naših specifičnih snaga povezivanja u rezilijentnosti.

 **Kada su u pitanju eTwinning događaji, na koje događaje ste najviše ponosni i šta biste promijenili u narednom periodu kada je u pitanju organizacija eTwinning događaja?**

U eTwinning-u posebno cijenim inicijative, pozive na djelovanje i zahtjeve za organizaciju eTwinning susreta koje dobijamo iz predškolskih ustanova, škola, drugih korisničkih organizacija i/ili udruženja prosvjetnih radnika. Naročito je zadovoljstvo biti jedan od prezentatora, promotora inspirativnih mogućnosti eTwinning-a i „otvoriti novi prozor“ za mogućnosti razvoja kompetencija, saradnje djece, učenika te brojnim prilikama za profesionalno usavršavanje i razvoj odgajatelja, nastavnika i drugih djelatnika u odgoju i obrazovanju, a koje su općenito trenutno vrlo skromne u domaćim obrazovnim sistemima u BiH.

Rado sam sa našim eTwinning ambasadorima, u sinergiji s ostalim članovima eTwinning tima, inicirala i kreirala brojne i različite formate eTwinning događaja, kao dio tima putovala s njima diljem BiH i „oslušivala“ potrebe praktičara u svrhu pripreme konkretne eTwinning podrške i eTwinning odgovora. Pored eTwinning ambasadora, u procesima dizajniranja i kreiranja sadržaja obuka, vebinara, radionica i konferencija, aktualizirala sam i participaciju iskusnih eTwinners-a u istim. Svrha ove inicijative je u kolegijalnoj podršci, umrežavanju, motiviranju, dijeljenju ideja, iskustava i entuzijazma u eTwinning-u. Taj segment angažiranosti u eTwinning-u mi je naročito blizak.

S druge strane, u organizacijskom ali i u pedagoškom smislu, najveći izazov za mene je predstavljao ljetni kamp „Ljetna inspiracija - moja profesionalna motivacija“, eTwinning događaj za početnike, prvi događaj te vrste organizovan u BiH. Svi u timu smo veoma ponosni na organizaciju i rezultate ove inicijative. Preporučila bih da se i u narednim ciklusima organizuje te da ljetni kamp traje najmanje četiri dana.

U ovoj godini ste imali priliku da pregledate/ocijenite mnoge eTwinning projekte, šta biste poručili našim eTwinnerima kako bi kvalitet projekata možda dostigao i značajnu evropsku nagradu?

Kada govorimo o kvalitetu, značajno je podsjetiti da u eTwinning-u postoje oznake kvaliteta i eTwinning nagrada (oznaka eTwinning škole, NQL i EQL i eTwinning Evropska nagrada) u kojima učestvuje eTwinning BiH. U 2023. godini 23 odgojno-obrazovne ustanove iz BiH su ponosni nosioci oznake eTwinning škole za 2023-2024. godinu; za pojedinačna učešća nastavnika iz BiH u eTwinning projektima, CSS je ove godine dodijelila 69 Evropskih oznaka kvaliteta; Državna služba sa podršku eTwinning-u u BiH je dodijelila 53 Državne oznake kvaliteta (NQL) eTwinner-ima za njihov pojedinačni projektni rad. Brojke dodijeljenih oznaka kvaliteta u ovoj godini su dosta visoke u odnosu na prethodne godine, brojnost naše eTwinning zajednice i broj projekata, i to je za svaku pohvalu i motivaciju, ali nas također obavezuje da u narednim ciklusima budemo još dosljedniji u unapređenju kvaliteta.

Kvalitet projekata i učešća u projektom radu se moderira i vrednuje na temelju zajedničkog evaluacijskog okvira i 5 kriterija (Saradnja među partnerskim školama, Korištenje tehnologije, Pedagoški pristupi, Integracija projekata u kurikulum i Rezultati i dokumentiranje). Preporučila bih našim eTwinner-ima da se brižljivo vode kriterijima zajedničkog okvira i kriterija u cilju unapređenja kvaliteta projektnih prijedloga, učešća u projektima, a samim tim i aplikacijom za oznaku kvaliteta i eTwinning Evropsku nagradu.

eTwinning Evropska nagrada je inicijativa Evropske komisije, a finansirana je u sklopu Erasmus+ programa Evropske unije. Ova nagrada predstavlja krunu provođenja eTwinning projekata u odgojno-obrazovnoj ustanovi. Projekt mora uspješno proći nekoliko faza ocjenjivanja prije no što uđe u selekcijsku fazu koja se sastoji još od tri dijela. Završni, treći dio provodi komisija sastavljena od predstavnika Evropske komisije, Evropske izvršne agencije za obrazovanje i kulturu i Centrale službe za podršku eTwinning-u. Četiri nominacije za ovu nagradu su ove godine iz BiH.

Poželim im puno uspjeha!

Šta je ono čime biste se pohvalili, a što biste zaboravili kada je u pitanju realizacija eTwinning aktivnosti u 2023. godini?

Postigli smo značajnu sinergiju unutar eTwinning tima BiH i podigli na viši nivo saradnju tima i iskusnih eTwinning ambasadora.


Rado bih zaboravila tehničke teškoće u funkcionalnosti ESEP platforme u implementaciji eTwinning projekta.

Analizirajući godišnju eTwinning temu Dobrobit u školama, kako biste motivisali eTwiner-e za osmišljavanje vlastitih projekata i eTwinning događaja u njihovim okruženjima?

Godišnja eTwinning tema za 2024. godinu „Dobrobit u školi” naglašava važnost dobrobiti i mentalnog zdravlja u školama i drugim odgojno-obrazovnim ustanovama. Obrazovni sistemi diljem Evrope uveliko prelaze sa fokusa na akademski uspjeh učenika, na drugačiji holistički pristup, koji podrazumijeva uravnoteženi razvoj kognitivnih, socijalnih i emocionalnih kompetencija učenika. U svjetlu ove teme i dobrobiti za učenike, veoma je važna i dobrobit nastavnika, koja se odnosi na različite aspekte nastavničkog poziva: radno opterećenje, radni uslovi i okruženje, fizičku sigurnost, kolegijalnu i institucionalnu podršku, profesionalno sagorijevanje itd.

Državna organizacija za podršku eTwinning-u je u okviru svojih aktivnosti u posljednja tri mjeseca pokrenula brojne aktivnosti na promociji teme „Dobrobit u školi”. Ističem radionice i aktivnosti na Devetoj godišnjoj eTwinning konferenciji održanoj početkom oktobra 2023. godine, a naročito na Regionalnoj radionici profesionalnog razvoja za eTwinning ambasadore početkom decembra 2023. godine, koja je u potpunosti bila posvećena dubljem razumijevanju dobrobiti u sistemu odgoja i obrazovanja. Na ovom eTwinning događaju i zajedničkom osposobljavanju su učestvovali NSO i eTwinning ambasadori iz Slovenije, Hrvatske, Bosne i Hercegovine, Srbije i Sjeverne Makedonije. Na temu dobrobiti održano je 6 radionica, dvije panel diskusije, jedno pozvano predavanje i izrađena su tri projektna paketa, što su sjajni inicijalni resursi potrebni za dublje i ujednačenije razumijevanje teme i fokusiranje na postizanje dobrobiti za sve u odgojno-obrazovnim sistemima.

Na Evropskoj platformi za školsko obrazovanje na raspolaganju je mnoštvo besplatnih resursa na ovu temu, za komunikaciju, zajedničko i samostalno učenje (publikacija, obuka, treninga, grupa, soba, foruma) radi dubljeg razumijevanja i pokretanja ili pridruživanja u projekte. Iskoristite besplatne edukacije, eTwinning domaće i međunarodne događaje, podršku eTwinning ambasadora, kapacitete školske i lokalne zajednice, kako bi dobrobit postala dio vaše svakodnevne prakse, kurikuluma na nivou razreda, škole i šire. U narednoj kalendarskoj godini DOP će, u skladu s potrebama eTwinning zajednice i Godišnjom eTwinning temom 2024 „Dobrobit u školi”, organizovati serije eTwinning događaja radi podrške i motivacije i umrežavanja eTwiner-a za učešće u projektnim aktivnostima.

 **U prethodnom periodu imali smo priliku saradivati sa NSO iz Evrope i regije. Koliko je upravo regionalna saradnja uticala na kvalitet provođenja eTwinning-a u našoj zemlji?**

Saradnja i saradničke aktivnosti između nacionalnih službi za podršku eTwinning-u su obavezujuće za sve i imaju visoko cijenjenu vrijednost u eTwinning-u, ne bez razloga. Za naš NSO saradnja i komunikacija sa NSO drugih država korisnica eTwinning-a su u stalnom razvoju i usponu. Samo u posljednja tri mjeseca ove kalendarske godine učestvovali smo u 4 eTwinning susreta za NSO i ambasadore međunarodnog i regionalnog karaktera, s tim da smo na jednom od tih dragocjenih susreta početkom decembra bili domaćini u Sarajevu. Susreti ove vrste su prilika učesnicima za učenje i umrežavanje, razmjenu iskustava, pokretanje inicijativa, evaluaciju završenih i planiranje narednih saradničkih i partnerskih eTwinning aktivnosti, što uveliko utiče na građenje i stalno unapređivanje kvaliteta eTwinning aktivnosti i njihove implementacije.

 **Šta biste poručili eTwinnerima i svim nastavnicima koji će možda već sutra biti dio naše eTwinning zajednice?**

Buduće eTwinner-e sa zadovoljstvom pozivamo da se registruju na platformu i pridruže najvećoj virtualnoj obrazovnoj zajednici odgajatelja i nastavnika u Evropi, koja je besplatna i sigurna. NSO pruža savjete i pomoć pri registraciji i svim fazama realizacije eTwinning projekata. eTwinning je zajednica čiji članovi saraduju u sigurnom okruženju i teže istom cilju – kvalitetnom odgoju i obrazovanju za svako dijete, cjeloživotnom učenju te kvalitetnijoj projektno orijentisanoj nastavi potpomognutoj svrsishodnim korištenjem digitalne (IK) tehnologije.

 **Vaša čestitka za Novogodišnje praznike bi glasila:**

Dragi eTwinner-i,

hvala Vam na prilici za suradnju, uz vas sam se osjećala cijenjeno i motivirano da budemo bolji i postignemo više!


U Novoj godini, svima od srca želim mir, dobro zdravlje, pozitivnu energiju i svaku dobrobit!

Draga Hašima, bilo je zadovoljstvo raditi s Vama u proteklom periodu i biti dio eTwinning tima i eTwinning zajednice. I pored svih, naizgled, nerješivih situacija, problema, koji su se dešavali prilikom realizacije mnogobrojnih aktivnosti - jer mnoge stvari nekad ne idu baš onako kako ih zamislite - MI SMO USPJELI! Uspjeli smo samo zato što smo djelovali kao tim i što smo imali snažnu podršku jedni drugih i ono što je bitno VJEROVALI SMO jedni drugima!

Zbog svih navedenih argumenta pozitivni rezultati u ovom ciklusu su bili neminovni. Premašili smo sva naša očekivanja i realizovali i više aktivnosti od unaprijed zacrtanih. I nemojte misliti da su to samo riječi hvale, mi djelima dokazujemo naše realizovane aktivnosti. Tih djela ne bi bilo da aposlutnu podršku našem timu nisu kontinuirano pružali i eTwinning ambasadori, sve eTwinning škole/školske zajednice i svi naši eTwinner-i što dalje upućuje na zaključak da je i sam eTwinning jedan veliki nerazdvojivi tim koji uzajamnom saradnjom i podrškom ostvaruje velike uspjehe!

Draga Hašima, želimo Vam puno zdravlja, sreće i još mnogo eTwinning dostignuća u Novoj 2024. godini! Vjerujemo da će naredna godina biti još uspješnija, a ovaj započeti eTwinning ritam može samo dobiti još jači tempo!

eTwinning tim



eTwinning

Alati za uređivanje videozapisa i pjesama

 Stvorite pjesme pomoću umjetne inteligencije




Splash Pro AI koristi generativni model za proizvodnju muzike visokog kvaliteta. Osim toga, možete primijeniti inovativni Text-to-Vocals generativni AI za dodavanje prilagođenih vokala za pjevanje ili repanje vašim pjesmama Fast ili AI.

Splash Pro koristi generativnu AI kako bi pojednostavio i personalizirao proces stvaranja pjesama. Koristi visoko sofisticiran sistem koji je detaljno objašnjen u nastavku:

- Splash Pro izgrađen je na biblioteci koja sadrži više od 100.000 petlji koje je sastavio osnivač aplikacije. Ove petlje pokrivaju razne instrumente kao što su bubnjevi, bas, ritam i glavni zvukovi.
- Podaci o obuci: Splash AI se obučava isključivo na Splash biblioteci.
- Generativni AI model stalno stvara novu muziku, a zatim indeksira muziku pomoću vlasničke tehnologije pretraživanja kako bi omogućili unos teksta u muziku. Ovo osigurava munjevito brze rezultate i omogućava maksimalno eksperimentisanje.
- Svestranost žanrova: Biblioteka pokriva mnoge popularne žanrove uključujući hip hop, pop, EDM i mnoge druge, nudeći bogatu raznolikost za korisnike.
- Text-to-Vocals AI: Kada je vaša muzika stvorena, možete koristiti inovativnu Text-to-Vocals generativnu AI za dodavanje vokala. Ovaj sistem je sličan umjetnoj inteligenciji za pretvaranje teksta u govor, ali je dizajniran za pjevanje i repanje.
- Konačno, uz kombinaciju ovih naprednih tehnologija, korisnici mogu kreirati vlastite pjesme prilagođene njihovim potrebama i kreativnosti.

Dragi nastavnici, ostaje Vam samo da isprobate mogućnosti koje nudi ovaj alat te DA Vaš čas, nastavni i vannastavni proces učinite inovativnijim i kreativnijim. Vjerujemo da će učenici uživati u osmišljavanju tematskih jedinica uz pomoć umjetne inteligencije.



U sljedećem izdanju našeg biltena donosimo još zanimljivije alate koje ćete, vjerujemo, iskoristiti na pravi način.

Pratimo potrebe učenika i osmišljavamo nova rješenja, metode u cilju postizanja funkcionalnih znanja i adekvatnih vještina i kompetencija.

Sve isprobajte i pronađite mnogo više informacija na: https://pro.splashmusic.com/?from=beatbot_fm

If you see someone
without a smile, give
them one of yours.



Dolly Parton

 **BILTEN**
AGENCIJA ZA PROJEKTOVANJE I JAVNA UPOSREDAVANJE
Istanbul - Beograd 2023 godine

